

## ***Wääschde noch?***

Wääschde noch, wie mir so klään  
unn noch inn de Schul gewään?  
Mir ware nitt onnaschd wie heit die Kinner,  
sischer nitt besser, awwa aach nitt schlimmer.  
Nur die Erziehung zu unsrer Zeit  
war halt onnaschda als wie heit.

Morjens, bevor die Stunn rischdisch ohngefong,  
iss die Frollein dursch die Reihe gong,  
ze gugge, ob die Näschel geputzd, die Hänn uff de Bonk,  
die Sackdiescher frisch unn die Schuh aach scheen blonk.  
Wie ware mir Määde so sauwa unn propp  
in unserm Schirzje mim dicke Schlopp.  
Unn mei Freindin, die war besonnersch scheen.  
Uff das ware se all neidisch gewään.  
Sei Schweschda hott em die Kläädscha genähd  
- ach, wenn doch jedes so e Schweschda hätt - !  
„Pitze Loggekäbbsche“, lieb, klään unn zart,  
war wie e Pipsche – vun besonnera Art.

Ach, an äämol, do denk isch heit noch drohn:  
Aufsatzschreiwe war uffem Stunneplon.  
Wie honn mir so muxmeisjestill do gesitzt  
unn iwwa unsrer Aawet geschwitzt!  
Die Lehring hat uns stännisch im Au gehat,  
damit nur jo kenner em onnre was saht.  
Doch pletzlich hat's so e Peifton genn,  
rischdisch laud; o jesses, wer iss das gewään?  
Eh mir begriff honn, was es wohl war,  
saht die Lehring, hadd unn klar:  
„Wer hat gepfiffen? Sofort her zu mir!“  
Do piepst e Stimmsche: „Isch – awwa isch kann nix defier.  
Isch honn doch nur de Mund gespitzt.  
Do iss de Ton äänfach raus geflitzt.“  
Was honn mir do so laud gelacht  
Unn unser Lehring hat aach mitgemacht.

Awwa sunschd, wenn ääns ebbes ohngestellld  
Unn hat sisch nitt sofort gemeld,  
isse mim Stegge dursch die Reihe gong  
unn ohne Pdong honn mir se allgaa gefong.  
Dissmol war de große Knall ausgeblieb,  
wahrscheins weil de sunschd imma warschd lieb.  
Inn da Paus honn mir imma noch gelacht.  
Doch mei Freindin hat geschwor, sie hätt 's nitt extra gemacht.

